

Jaarverslaag v.v. De Wien 2024-2025

Jaorvergadering

Op 12 juni waas ózze jaorlikse Algemeine Lejevergadering, wao de jubilarisse François Vervoort en Max van Ex (11 jaor actief lid) gehuldig woorte. Gerard Vonk (22 jaor actief lid) waas neet aanwezig, maar d'r wuurt op ein later móment beej zien jubileum stilgestaon. Neteurlik woort ouk stilgestaon beej de vertrekkende kemissieleje die bedank woorte veur eure inzet.

Wiener Leedjes Festival

Op zaoterdaag 12 oktoeëber waas 't tied veur 't Wiener Leedjes Festival. In ein bómvolle zaal woorte 13 leedjes gezóng en kwame de zaal en de vakzjuries unaniem wies 't oordeil det François Vervoort en John Baur met eur leedje "Van Venetië nao Venlo" de ierste plek veur eur raekening mochte neme. Wäörd zien aafkómstig van Linda Smeets en de meziek van Marcel Driessen. De tweeëde plaats ging nao 't leedje "Haopeloos verwaald" gezóng door Ingrid Janssen en Roy van den Broek. Geschreve door Linda Smeets met meziek van Marcel Driessen. De derde plaats waas veur 't leedje "Dit kin gen toeval zien" gezóng door Marc Houwen, Leon Theuws, Sandra Schattenkerk en Marion Nijssen. Wäörd zien geschreve door Marc Houwen en de meziek is van Mirthe van Dijk.

Inschete

Ouk dit jaor woort de vastelaovend op 11 november weer traditioneel ingeschaote op de Mert veur 't stadhoes door de trio's van de Venlose vastelaovesvereniging. En aansloetend vólgede ein leuk programma op de buun.

Kerskiene

't Waas deze kier waat minder drök as andere jaore. Maar in de zaal beej 't Gildehoes zote op vriedaag 13 december vuuel gaste die zin hadde in eine gezellige aovend kiene. Zoeë wie altied waas 't eine aovend vol spanning, emoties en prachtige prieze!

Prinsegala

Op zaoterdaagmiddag 25 jannewari woort 't nije trio in 't geheim veurgesteld aan de iereleje, bestuur en Raod van Elf. 's Aoves waas 't dan intelik tied veur ózze Prinsegala. Domani zoog d'r fantastisch oet en waas gevöld met maar leefs 350 in moeëje kledjes en smoking gekleide dames en hiere. Ónder de klanke van 'O Fortuna' kwaam ein gezelschap mónnike vanoet achter in de zaal nao veur gewandeld. Op de buun ginge dreej mónnike achter eine tempel staon. Vors Wienius goof inkele aanwizinge en dao ware zeej dan: Prins Rob II Geraedts met zien adjudante Joost Wetzels en Floris Lina. 't Nije trio woort veurzeen van alle regalia, de vruikes woorte in de bleumkes gezatte, wao nao de äöpeningsdans kós beginne. D'r volgde eine fantastische aovend ónder muzikale leiding van Khick. Ós eige Wienleedjes woorte gezóng en d'r ware optraejes van Ronald en Carien, Enne Bink, Milou en Lieke van de Herfshane en Kaylee.

Vlaghijse en Groeët Venlose Gulpener Hierezitting

Ouk dit jaor waas daags nao 't Prinsegala idderein weer fris en fruitig beej Domani aanwezig um de vlag te hijse en de vastelaovestied officieel te starte. En zoeë wie gebroekelik brach 't nije trio eure liefspreuk ten gehure, woort de proklamasie veurgelaeze en woorte de Wienleedjes gezóng. Aansloetend haet 't trio eur medalie oetgereik aan de aanwezige familieleje, bestuurs- en kemissieleje, iereleje, leje van verdeenste en ald prinse. En toen waas 't tied veur de Hierezitting. D'r ware optraejes van ónder mier Auk Kwant, Bart Boullard, Rob und Janneke, Rob van Elst, Große Garde Kaldenkirchen en Alpen Anna.

Joeks Tam-Tam en Familie vastelaoveskiene

En dan is 't vriedaagaovend nao 't oetkómme van 't groeëte trio en is intelik d'n tied aangebraoke veur 't nije jeugtrio. Op vriedaag 31 jannewari woorte zeej oetgerope in kefee

De Witte tiejes de Joeks-Tam-Tam: Prins Jules I Nab en zien adjudante Susan van Eijk en Pepijn Kohlen! 't Waas eine drökke en gezellige aovend met optraejes van ónder mier Wae hebbe we dao dan en Lars Broekman. Same met 't groeëte trio woort d'r gefees en gedans wies in de late äörkes.

Jeugreceptie

Op vriedaag 7 fibberwari vónd de receptie van ós jeugtrio plaats. Zustervereniginge, familie, vrinde, bestuur, kemissieleje, Raod van Elf, 't groeëte trio en ald prinse kwame ós jeugtrio fillisitere. 't Waas ein gezellige receptie en lang gezellig beej Kefee De Witte.

H. Mis en groeëte receptie op zóndaag 29 janneuari

De traditionele vastelaovesmis vónd plaats op zóndaag 9 fibberwari in de Familiekerk. Ein prachtige vastelaovesmis ónder leiding van Daeke Spee met zang van ónder mier Ingrid Janssen & Marcel Driessen, Gé Deenen, Milou Geraedts, Bas Holthuijsen, Kim Boots en ózze eige Ald Prinse. Nao aafloop haet ós trio iers gecollecteerd veur de Stichting Vrinde van SGL en aansloetend vertrok 't gezelschap nao Domani veur de groeëte receptie die um 14.00 oor begós. 't Waas ein drök bezóchte en lange receptie met ein kómme en gaon van vereniginge, familie en bekinde van 't trio.

Op zóndaag 16 fibberwari woorte de recepties bezóch van Jocus, de Vogelhut en de Gaaskaetel.

Zaoterdaag 22 fibberwari waas eine drökke daag veur 't trio en de Raod van Elf met diverse verplichtinge. Alleriers d'n optóch van de 3-Kes en 't oetrope van de groeët Venlose Nar. Vervólges 't make van de prinsefoto van Groeët Venlo, de recepties van de Kwas en de Törvers.

Zóndaag 23 fibberwari kwaam idderein al weer vruueg beej mekaar veur d'n Blierickse daag. Vanoet 't Poskantoeër ging 't ganse gezelschap met de bus nao 't hoes van d'n Hoeëgheid ónder muzikale begeleiding van Joekskepel Petatte Nelke. Beej d'n Hoeëgheid veur de deur waas 't tied veur ein wäördje door Vors Wienius en d'n Hoeëgheid, wao nao idderein binne woort veurzeen van aete en drinke. D'r waas ein spetterend optraeje van Neppie Kraft det de ganse tent op de kop zoot. Van dao oet vertrók 't gezelschap met de bus nao de recepties van de Wortelepín, de Vaegers en de Moeraskwaakers.

Zoeë wie idder jaor ginge Raod van Elf en trio daags nao d'n Blierickse daag nao de Maaspoort veur 't Fortissimo-kónzert.

Schoeëlendaag / Muts van d'n Bluts

Op vriedaag 28 fibberwari brachte 't trio en diverse raodsleje ein bezeuk aan diverse schoeële en de Vastelaoves Top 555 op de Parade. Muts van d'n Bluts waas dit jaor beej de Alde Mert wao rónnd de klok van 21.00 oor d'n tied waas gekómme um de mutse van de Raod van Elf en 't trio officieel aaf te zette.

Op vastelaoveszóndaag verzamelde vuuel Wien-leje zich beej brasserie De Witte veur 't aaftraeje van ós Jeugtrio. Dao woort op fantastische wies aafscheid genaome van ós jeugtrio in samewerking met Jocus Toekóms.

Weej kinne weer truuk kieke op ein geweldig vastelaovessezoen, waarin weej ós van ózze beste kant hebbe laote zien.

Wienböl en Wienbölkes; hertelik dank veur alles!

Sikkertaris,
Corina Zanders

Vice-veurzitter,
Rob van Tankeren